

## 每週經課朗誦經文(巴克禮漢羅/教羅)2013/03/03

### 共同經課 - 1 以賽亞書五十五章一節~九節

1 Eh, 見若 lín 嘴乾 ê, tiòh 來就近水, 也無錢 ê, lín tiòh 來; 來買來食; 來 ah, m̄免銀, m̄免價錢, 來買酒 kap 奶。2 Lín 啥事開費錢, 買 hit-ê boē 食得 ê 物? 啥事 tiòh 磨, tī hit-ê boē hō 人食飽 ê ah? lín tiòh 留心聽我, 就會食 hit-ê 好物, 得 tiòh 享受油膩, hō 心歡喜。3 Lín tiòh 俯耳孔就近我; tiòh 聽, 就 lín ê 心神會活; 我 beh kap lín 立永遠 ê 約, 就是所應允大衛堅固 ê 恩惠。4 看 ah, 我已經設立伊做列邦 ê 干證, 做列邦 ê 君王 kap 首領。5 看 ah, 你平素 m̄-bat ê 百姓, 你 beh 叫伊來; 平素 m̄-bat 你 ê 百姓亦 beh 走來 oá 你; lóng 是為 tiòh 耶和華你 ê 上帝, 以色列 ê 聖 ê; 因為伊已經榮光你。6 Tiòh 趁耶和華 thang chhē-tiòh ê 時, 來 chhē 伊, tī 伊相近 ê 時求叫伊。7 Phái<sup>n</sup> 人 tiòh 離開伊 ê 路, 不義 ê 人 tiòh 改換伊 ê 念頭; 歸向耶和華, 祂 beh 憐憫伊; 歸向咱 ê 上帝, 因為祂 beh 遍行赦免。8 耶和華講, 我 ê 念頭 m̄ 是 lín ê 念頭, lín ê 路 m̄ 是我 ê 路。9 因為天怎樣 khah 高地, án-ni 我 ê 路 khah 高 lín ê 路, 我 ê 念頭 khah 高 lín ê 念頭。

### 共同經課 - 2 詩篇六十三篇一節~八節

1 大衛 tī 猶大曠野 ê 時做 chit 首詩。1) 上帝 ah, 你是我 ê 上帝; 我趁早 beh chhē 你。Tī 炕旱, 困苦, 無水 ê 地, 我 ê 心嘴乾 siàu 念你, 我 ê 肉體切切欣慕你。2 我 bat án-ni tī 聖所朝見你, 為 tiòh ài 看你 ê 權能 kap 你 ê 榮光。3 因為你 ê 慈愛比性命 khah 好, 我 ê 嘴唇 beh o-ló 你。4 我 iáu 活 ê 時, beh án-ni o-ló 你; 我 beh 奉你 ê 名, kiàh 起我 ê 手。5 我 ê 心神 beh 飽足, 親像食骨髓油膩; 我亦 beh 用歡喜 ê 嘴唇 o-ló 你; 6 就是我倒 tī 眠床記念你, Tī 暝間 tàk 更 siàu 念你 ê 時。7 因為你 bat 幫贊我, 我 tiàm tī 你翼股 ê 致蔭下 beh 歡喜出聲。8 我 ê 心 tè 你 tiâu-tiâu; 你 ê chià<sup>n</sup> 手扶持我。

### 共同經課 - 3 哥林多前書十章一節~十三節

1 兄弟 ah, 我 m̄ ài lín m̄ 知咱 ê 列祖 lóng tī 雲下, 也 lóng tùi 海中經過, 2 也 lóng tī 雲中海中受洗禮歸 tī 摩西, 3 也 lóng 食同一樣靈 ê 食, 也 lóng lim 同一樣靈 ê 奶; 4 因為 in 所 lim ê 是 tùi tè in 靈 ê 石磐出, hit-ê 石磐就是基督。5 但是 in 中間 khah choē 人 hō 上帝無歡喜; 因為 in ê 身屍橫逆 tī 曠野。6 Ta<sup>n</sup> chiah-ê 事是做咱 ê 鑑戒, hō 咱莫得愛 pháí<sup>n</sup>, 親像 in 愛 pháí<sup>n</sup> 一樣。7 Lín 也莫得拜偶像, 親像 in 中間有人拜伊; 照所記載講, 百姓坐 teh lim 食, 起來跳舞。8 咱也莫得行淫, 親像 in 中間有人行淫, 一日死兩萬三千人。9 咱也莫得試主, 親像 in 中間有人試伊, 就 hō 蛇咬死。10 Lín 也莫得 ngáu<sup>n</sup>-ngáu<sup>n</sup> 念, 親像 in 中間有人 ngáu<sup>n</sup>-ngáu<sup>n</sup> 念, 就 hō 剿滅 ê 滅 in。11 Ta<sup>n</sup> in tú-tiòh chiah-ê 事是做鑑戒, 續記載來警戒咱, 就是 chiah-ê 世代尾 ê 人。12 所以家己掠做 khiā 在 ê, tiòh 謹慎驚了跋倒。13 Lín 所 tú-tiòh ê 試無 m̄ 是人 ê 常事; 上帝是信實, 無 beh hō lín tú-tiòh 試過頭 tī lín 所能當; 就是 tī 受試 ê 時 beh 續開脫出 ê 路, hō lín 當會起。

### 共同經課 - 4 路加福音十三章一節~九節

1 當 hit 時有幾 nā 人 tī-teh, 將加利利人 ê 事 kā 耶穌講, 就是彼拉多將 in ê 血 chham tī in ê 牲禮 ê。2 耶穌應講, 因為 chiah-ê 加利利人受 chit 號 ê 害, lín phah 算 in 比眾加利利人 khah 有罪 mah? 3 我 kā lín 講, m̄ 是; lín 若無反悔, lóng beh 親像 án-ni 滅無。4 á 是 hit 十八人, hō 西羅亞 ê 塔倒落來 teh 死 ê, lín phah 算 in 比 lóng 總 khiā 起 tī 耶路撒冷 ê 人犯罪 khah 重 mah? 5 我 kā lín 講, m̄ 是; lín 若無反悔, lóng beh 照 án-ni 滅無。6 伊就設一個譬喻講, 某人有一叢無花果樹栽 tī 伊 ê 葡萄園裡; 就來 hit 叢 chhē 果子, chhē 無。7 Chiah 對管園 ê 講, 你看, 我連連三年來 tùi chit 叢無花果樹 chhē 果子, chhē 無。Tiòh kā 伊 chhò 起來; 啥事 hō 伊也 tìn 所在? 8 應伊講, 主 ah, 今年請 koh 容允伊; thèng 候我四圍掘鬆 èng 肥; 9 後來若結果子, 就好; 若無, 你 chiah kā 伊 chhò 起來。